

FATWA ANAK TAK SAHTARAF



ENAKMEN MUFTI DAN FATWA (KEDAH DARUL AMAN) 2008 PEMBERITAHUAN FATWA DI BAWAH SEKSYEN 24

FATWA ANAK TAK SAHTARAF

Pada menjalankan kuasa yang diberikan oleh seksyen 23 dan 24, Enakmen Mufti dan Fatwa (Kedah Darul Aman) 2008 [*Enakmen No. 10 Tahun 2008*]; Jawatankuasa Fatwa dan atas titah perintah Kebawah Duli Yang Maha Mulia Sultan Negeri Kedah Darul Aman dengan ini menyiarkan fatwa seperti dinyatakan dalam Jadual.

JADUAL

Berdasarkan keputusan Mesyuarat Jawatankuasa Fatwa Negeri Kedah Darul Aman yang bersidang pada 26 Julai 2020, inilah diputuskan fatwa untuk diguna pakai di Negeri Kedah Darul Aman seperti berikut:

1. Anak tak sahtaraf mengikut hukum Syarak ialah;

- (i) Anak yang dilahirkan bukan daripada pernikahan yang sah sama ada akibat zina, rogol dan dia bukan daripada persetubuhan syubhah atau bukan daripada anak perhambaan;
- (ii) Anak yang dilahirkan kurang dari 6 bulan 2 saat (*lahzah*) *qamariah* dari waktu "*imkan ad-dukhu*"; dan
- (iii) Anak yang dilahirkan lebih dari 6 bulan 2 saat (*lahzah*) *qamariah* dari waktu "*imkan ad-dukhu*" selepas akad yang sah dan ada bukti dari segi syarak bahawa anak tersebut adalah anak luar nikah melalui pengakuan (*iqrar*) mereka yang berkenaan (sama ada suami dan isteri tersebut atau salah seorang daripadanya).

2. Penamaan anak tak sahtaraf;

- (i) Anak tak sahtaraf hendaklah di “bin” atau di “binti” kepada “Abdullah” atau salah satu daripada nama-nama Allah (*Asmaul Husna*) dengan penambahan “Abdul” seperti Abdul Rahman, Abdul Qadir, Abdul Muhaimin dan lain-lain;
- (ii) Tidak dibenar nama anak tak sahtaraf itu tanpa perkataan di “bin” atau di “binti”;
- (iii) Anak tak sahtaraf tidak boleh di “bin” atau di “binti” kepada bapa biologi yang menyebabkan kehamilan anak tak sahtaraf itu atau yang mengaku menjadi bapa kepada anak tersebut; dan
- (iv) Sekiranya bapa biologi bernama Abdullah atau salah satu daripada nama-nama Allah (*Asmaul Husna*), maka anak tak sahtaraf itu hendaklah di “bin” atau di “binti” kepada nama-nama Allah (*Asmaul Husna*) yang lain selain daripada nama bapa biologi tersebut.

3. Kesan anak tak sahtaraf;

- (i) Syarak hanya mengiktiraf sabit anak tak sahtaraf hanya di sebelah ibunya (ke atas dan ke bawah) sahaja. Oleh itu, mereka menjadi mahram, boleh mewarisi serta bertanggung hak nafkah dan *hadhanah* antara satu sama lain; dan
- (ii) Jika bapa biologi berkahwin dengan ibu kepada anak tak sahtaraf dan sabit persetubuhan, maka;
 - (a) hubungan bapa biologi dengan anak tak sahtaraf itu adalah seperti hubungan bapa tiri dengan anak tiri dan mereka adalah mahram;
 - (b) bapa biologi itu tidak boleh menjadi wali kepada anak tak sahtaraf tersebut; dan
 - (c) bapa biologi dan anak tak sahtaraf itu tidak berhak mewarisi harta pusaka antara satu sama lain.

4. Kesalahan;

Mana-mana orang yang tidak mematuhi Perkara di perenggan 2 (i), (ii), (iii) dan (iv) adalah menjadi suatu kesalahan melanggar fatwa.

5. Pemansuhan;

Fatwa mengenai “ANAK TAK SAHTARAF” yang telah disiarkan melalui *Warta* No. 506. Jil. 54 No.13 Tahun 2011 bertarikh 23 Jun 2011 dengan ini dimansuhkan.

[(73) dlm.JMNK(F)603 Jld. 2; PUN(KD) 600-1/5/3(4)]

Tarikh Warta : 1 April 2021

Tarikh Keputusan : 26 Julai 2020